

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ԸՈՒՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ
P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Է. Տարի, Թիւ 276, Ուրբաթ, 27 ՄԱՐՏ, 2015

ՀԱՄԱՅՆՔԱՅԻՆ

Մասիս Ծ. Վրդ. Զօպունեան Ընտրուեցաւ Առաջնորդ Քուէթի Եւ Շրջակայից Թեմին

Անհուն բերկրութեամբ կը ծանուցենք թէ՛ Քուէթի եւ Շրջակայից Թեմի երեսփոխանական ժողովը իր Ա. Արտակարգ ժողովի ընթացքին, քառամեայ նստաշրջանի պաշտօնավարութեան համար միաձայնութեամբ Թեմիս Կաթողիկոսական Փոխանորդ Գերպ. Տ. Մասիս Ծ. Վրդ. Զօպունեանը ընտրեց Առաջնորդ Քուէթի եւ Շրջակայից Թեմին:



Ընտրութեան արդիւնքը յատուկ նամակով ուղարկուեցաւ Մեծի Տանն Կիլիկիոյ Կաթողիկոս՝ Ն.Ս.Օ.Տ.Տ. Արամ Ա. Վեհափառ Հայրապետին, առ ի վաւերացումն: Նորին Սրբութիւնը հաստատելէ ետք Գերպ. Տ. Մասիս Ծ. Վրդ. Զօպունեանի առաջնորդական ընտրութիւնը, մաղթեց, որ Ամենաբարին Աստուած Առաջնորդ Հայր Սուրբին պարգևէ քաջառողջութիւն եւ ամբողջական յաջողութիւն՝ իր ազգային-եկեղեցական ծառայութեան մէջ: Նորին Սրբութիւնը նաեւ մաղթեց, որ Հայր Սուրբին հովանաւորութեան ներքէւ եւ Ազգ. Իշխանութեան գործակցութեամբ առաւել եւս ծաղկի Թեմի զաւակներուն կեանքը՝ բոլոր բնագաւառներէն ներս:

Սիրելիներ, Ի սրտէ կը շնորհատրենք մեր ժողովուրդը այս բարեբախտ ընտրութեան համար, ինչպէս նաեւ քաջառողջութիւն եւ անսպառ կորով կը մաղթենք մեր նորընտիր առաջնորդին՝ իրեն վստահուած ծանր բեռը պատուով տանելու եւ մեր թեմը առաջնորդելու նորանոր յաջողութիւններու:

Այս առիթով, այսօր, Ուրբաթ, 27 Մարտ 2015-ին, որ կը զուգադիպի մեր Տիրոջ Յիսուսի Քրիստոսի յաղթական Երուսաղէմ մուտքի տօնին՝ Ծաղկազարդին, կը հրաւիրենք մեր ժողովուրդը ներկայ գտնուելու թեմիս նորընտիր առաջնորդի անդրանիկ քարոզի ունկնդրութեան, որմէ ետք թափօրով նորընտիր առաջնորդը պիտի առաջնորդուի Արարատ սրահ, ուր պիտի ընդունի թեմի ազգային մարմիններուն ու ժողովուրդին շնորհատրութիւնները:

Դիւան Ազգային Երեսփոխանական ժողովի

Քուէթ, 26 Մարտ 2015

www.armenianprelacykw.org

ARMENIAN CATHOLICOSATE
OF CILICIA
Antelias, Lebanon



كاثوليكوسية
الأرمن الأرثوذكس
أنطلياس، لبنان

ԿԱԹՈՂԻԿՈՍԱՐԱՆ ՄԵՇԻ ՏԱՆՆ ԿԻԼԻԿԻՈՅ
Անթիլիաս, Լիբանան

Քիւ 28/15

Անթիլիաս, 26 Մարտ 2015

Մեծայարգ
Տիար Յարութ Պետրեան
Ատեմապետ
Ազգ. Երեսփոխանական Ժողովի
Քուէյթի եւ Շրջակայից բեմ
Քուէյթ

Սիրելի՛ Պրն. Պետրեան,

Շնորհակալութեամբ ստացանք Ձեր 25 Մարտ 2015 բուսկիր եւ 45/4 բուս-
համար նամակը, որով կը յայտնէք, թէ Քուէյթի եւ Շրջակայից բեմի Ազգ.
Երեսփոխանական Ժողովը իր արտակարգ նիստին, 24 Մարտ, բեմին Առաջնորդ
ընտրած է Գերսոպատիւ Տ. Մասիա Մ. Վրդ. Զօպուեանը:

Այսու գրով կը վաւերացնենք Գերպ. Տ. Մասիա Մ. Վրդ. Զօպուեանի ընտրու-
թիւնը:

Կ'ազօրենք, որ Ամենաբարին Աստուած Առաջնորդ Հայր Սուրբին պարգևէ
բաշտողչութիւն եւ ամբողջական յաջողութիւն՝ իր ազգային-եկեղեցական ծա-
ռայութեան մէջ: Քող իր հովանաւորութեան ներքեւ եւ Ազգ. Իշխանութեան գոր-
ծակցութեամբ առաւել եւս ծաղկի Քուէյթի եւ Շրջակայից բեմի մեր սիրելի զա-
ւակներուն կեանքը՝ բոլոր բնագաւառներէն ներս:

Հայրապետական օրհնութեամբ եւ սիրոյ շերտ ողջունիւ,

Աղօթարար՝

ԱՐԱՄ Ա. ԿԱԹՈՂԻԿՈՍ
ՄԵՇԻ ՏԱՆՆ ԿԻԼԻԿԻՈՅ

ՇԷՅԽԱ ՖԱՐԻՀԱ ՀՈՎԱՆԱԻՈՐԵՑ՝ «ՏԻՊԱՐ ՄՕՐ» ԵՒ «ՏԻՊԱՐ ԸՆՏԱՆԻՔԻ» ՁԵՌՆԱՐԿԻ ՆՇՈՒՄԸ

Շաբաթ, 21 Մարտի երեկոյեան, Քուէթի «Տասմա» սրահին մէջ, մայրերու տօնին առթիւ՝ հովանաւորութեամբ եւ ներկայութեամբ Քուէթի Իշխանին քրոջ՝ Շէյխա Ֆարիհա Ալ ժապեր Ալ Մապահին, տեղի ունեցաւ «Տիպար Մօր» եւ «Տիպար Ընտանիքի» նշում, որու ընթացքին պարզեւատրուեցան զանազան անձնաւորութիւններ: Հանդիսութեան ներկայ գտնուեցան Քուէթի գահաժառանգին տիկինը, Մարմնակրթութեան եւ Երիտասարդութեան նախարարը եւ զանազան երեւելի անձնաւորութիւններ: Սոյն ձեռնարկին ներկայ գտնուեցաւ Թեմիս Կաթողիկոսական Փոխանորդ Գերայ. Ս. Մասիս Ծ. Վրդ. Զօպուեանը, որուն ընկերացան գաղութիս հոգեւոր հովիւ՝ Արժ. Ս. Արտակ Քինյ. Քէհեաեանը եւ Ազգային Վարչութեան անդամ՝ Ռաֆֆի Աբիկեանը: Այս առթիւ Գերայ. Հայր Սուրբը շնորհաւորեց Շէյխա Ֆարիհայի նախաձեռնութիւնը եւ անոր գլխաւորած «Տիպար Ընտանիք» կազմակերպութեան աշխատանքները:



ԱՅՑԵԼՈՒԹԻՒՆ ՔՈՒԷՅԹԻ ԿԱՐՄԻՐ ՄԱՀԻԿԻ ՆԱԽԱԳԱՀԻՆ



Հինգշաբթի 19 Մարտի կէսօրին Թեմիս Կաթողիկոսական Փոխանորդ Գերայ. Ս. Մասիս Ծ. Վրդ. Զօպուեան, ընկերակցութեամբ ազգային վարչութեան ատենապետ Սունիր Դարբինեանի եւ Ազգային Վարժարանի հոգաբարձութեան ատենապետ Զաւէն Թոզմաքճեանի այցելեց Քուէթի Կարմիր Մահիկի միջազգային կազմակերպութեան կեդրոնատեղին եւ հանդիպում մը ունեցաւ կեդրոնի նախագահ՝ Առողջապահութեան նախկին նախարար՝ Տք. Հիլալ Ալ Մայէրին հետ: Հանդիպման ընթացքին Տք. Հիլալ ամփոփ կերպով ներկայացուց կազմակերպութեան մարդասիրական աշխատանքներն ու ծրագիրները, մանաւանդ զանազան երկիրներու մէջ սուրիացի գաղթականներուն անոնց մատուցած օժանդակութիւնները:

Գերայ. Հայր Սուրբը գնահատելէ ետք կազմակերպութեան աշխատանքները շեշտեց, որ Քուէթը մարդասիրական օժանդակութիւններու մէջ այլ պետութիւններու շարքին առաջինը կը դասուի, առանց խտրութիւն դնելու կրօնքի, գոյնի եւ ցեղի: : Այնուհետեւ Հայր Սուրբին պատուիրակութեան անդամները խօսեցան Քուէթի հայ համայնքի եւ Ազգային Վարժարանի մասին:

ՀԱՅԿԱԿԱՆ

ՀՅԴ-ն Կ'առաջարկէ 9 Ղեկտեմբերը Հոչակել Ցեղասպանութեան Դէմ Պայքարի Օր

Հայաստանի Հանրապետութեան Ազգային ժողովի նիստին, երբ կը քննարկուէր «Հայաստանի Հանրապետութեան տօներու եւ յիշատակի օրերու մասին» օրէնքին մէջ փոփոխութիւն եւ լրացում կատարելու մասին հարցը, որով կը նախատեսուի 9 ղեկտեմբերը սահմանել իբրեւ Ցեղասպանութեան զոհերու յիշատակի միջազգային օր, Ազգային ժողովի ՀՅԴ խմբակցութեան պատգամաւոր Արծուիկ Մինասեան հարցում ուղղած է հիմնական զեկուցող, Ազգային ժողովի Հայաստանի հանրապետական կուսակցութեան խմբակցութեան պատգամաւոր Արտակ Չաքարեանին:



«Հաւանաբար տեղեակ էք, թէ ինչո՛ւ 24 ապրիլը նկատուած է Ցեղասպանութեան զոհերու յիշատակի օր: «Հայոց» բառը յատուկ չէ շեշտուած՝ նկատի առնելով, որ ցեղասպանութիւն ապրած այլ ժողովուրդները կրնան այդ օրը հայերուն հետ յիշել այդ օրը: Այս փոփոխութեամբ կարծես մենք յատուկ կը շեշտենք, որ 24 ապրիլը միայն հայերուն կը վերաբերէր, աստիկա որքա՞ն նպատակայարմար է: Երկրորդ հարցումը՝ 9 ղեկտեմբերը Ցեղասպանութեան զոհերու յիշատակի օր յայտարարելը կը նշանակէ, որ մեր հայկական տօնացոյցին մէջ կ'ունենանք անընդհատ զոհերու մասին վկայութիւն: Այն, որ դուք աստիկա կը կապէք ՄԱԿ-ի հոչակագիրին, այնտեղ զոհերու մասին խօսք չկայ, այնտեղ խօսք կայ պայքարի, կանխարգիլման եւ պատիժի մասին: Այլ խօսքով, ճիշդ չ'ըլլա՞ր, որ 9 ղեկտեմբերը հոչակուի Ցեղասպանութիւններու դէմ պայքարի միջազգային օր», հարց տուած է Արծուիկ Մինասեան՝ շեշտելով, որ պայքարի օր յայտարարելը ասելի տրամաբանական կ'ըլլար:

Արտակ Չաքարեան նշած է, որ ՄԱԿ-ի հոչակագիրը ցեղասպանութեան կանխարգիլման եւ պատիժի մասին կը խօսի: «Քանի որ մեր յիշատակի օրացոյցին մէջ չունինք բոլոր ցեղասպանութիւններու զոհերու յիշատակի օր, բնականաբար, 9 ղեկտեմբերը մեզի կարելիութիւն կու տայ յիշելու եւ յարգանքի տուրք մատուցելու այդ բոլոր ժողովուրդներուն», ըսած է Արտակ Չաքարեան:

Արծուիկ Մինասեան արձագանգած է ըսելով. «Ես այնպէս հասկցայ, որ մեր առաջարկը կը մերժէք: Անգամ մը եւս կարդացէք ՄԱԿ-ի հոչակագիրը, ուր զոհերու մասին խօսք չկայ, ինչո՛ւ մենք արհեստականօրէն կը ձեւաւորենք աստիկա, երբ կրնանք ցեղասպանութիւններու դատապարտման ծիրին մէջ նաեւ յարգել ցեղասպանութիւններու զոհերու յիշատակը, բայց տօնացոյցին մէջ ունենալ ցեղասպանութեան զոհերու յիշատակի երկու օր՝ առանձնացնելով

զանոնք: Ատո՞վ կը վնասենք Հայոց ցեղասպանութեան զոհերու յիշատակին: Պէտք է տրամաբանութեան ծիրին մէջ գործենք»:

Արտակ Ջաքարեան պատասխանած է. «Տրամաբանութեան ծիրին մէջ է, չէի ուզեր, որ դուք մտածէք, թէ մենք ձեր առաջարկը կը մերժենք, կ'աշխատինք միասին, կը բարելաւենք օրէնքը»:

Ազգային ժողովի շնորհիւ ՀՅԴ խմբակցութեան ղեկավար Արմէն Ռուստամեան իր կարգին նշած է, որ միշտ կը խօսուի այն մասին, որ ցեղասպանութեան մասին պէտք չէ խօսուի միայն լաց ու կոծի ծիրին մէջ, այլ նաեւ՝ պայքարի:

«Մենք ունինք հատուցման եւ պայքարի հերոսներ՝ Սողոմոն Թեղլիբեան, Արշալիր Շիրակեան եւ այլք, որոնք պայքարած են եւ վառ պահած ցեղասպանութեան դէմ պայքարի ոգին: Ձեռակերպումներուն մէջ իսկապէս պէտք է պայքար մատնանշենք՝ կա՛մ դատապարտման եւ կանխարգիլման օր, կա՛մ ցեղասպանութեան դէմ պայքարի օր», ըսած է Արմէն Ռուստամեան:

Հոլլանտ 24 Ապրիլին 120 Հոգինոց Պատուիրակութեամբ Պիտի Այցելէ Ծիծեռնակաբերդ

Հայաստանի մէջ Ֆրանսայի դեսպան Ժան Ֆրանսուա Շարփանթիէ «Արմէնփրես» լրատու գործակալութեան յայտնած է, որ Ֆրանսան Երեւանի մէջ Հայոց ցեղասպանութեան ոգեկոչման արարողութեան պիտի մասնակցի երկրի ղեկավարի մակարդակով եւ այդ մասնակցութիւնը իր մէջ պիտի պարունակէ երեք կոչ՝ յիշողութիւն, յարգանքի տուրք զոհերու յիշատակին եւ պատասխանատուութիւն, որպէսզի հետագային այդպիսի սարսափելի դէպքերը այլեւս չկրկնուին:



Ան ըսած է, որ ներկայ դրութեամբ Հայաստանի մէջ ֆրանսական դեսպանատունը կ'աշխատի Հոլլանտի այցելութեան կազմակերպման վրայ: «Ֆրանսուա Հոլլանտ բաւական մեծ՝ մօտաւորապէս 120 հոգինոց պատուիրակութեամբ պիտի հասնի Երեւան: Ստոյգ կազմի մասին տակաւին տեղեկութիւններ չկան: Պարզապէս կրնամ ասելցնել, որ Ֆրանսայի հայ համայնքի ներկայացուցիչներ ներգրաւուած պիտի ըլլան այդ պատուիրակութեան կազմին մէջ», ըսաւ Շարփանթիէ:

Լեհաստանի Նախագահը 24 Ապրիլին Պիտի Այցելէ Հայաստան

Երեւանի մէջ Եւրոնեսթի խորհրդարանական համախմբումի չորրորդ նիստին մասնակցելու համար Հայաստան այցելած Եւրոպական խորհրդարանի լեհ փոխնախագահ Ռիչարտ Չառնեքի «Ժողովուրդ» օրաթերթին յայտնած է, որ կը յուսայ 24 ապրիլին ցեղասպանութեան 100-ամեակի ոգեկոչման ձեռնարկներուն ընթացքին ներկայացնել Եւրոպական խորհրդարանը: Պատասխանելով Լեհաստանի նախագահի այդ ձեռնարկներուն մասնակցութեան կարելիութեան վերաբերեալ հարցումի մը՝ ան ըսած է, որ Հայաստանի նախագահ Սերժ Սարգսեան Լեհաստանի նախագահը հրաւիրած է Երեւան եւ ան այդ օր ներկայ պիտի գտնուի Հայաստանի մէջ:

Զուիցերիոյ Խորհրդարանական Պատուիրակութիւնը Եւ Պիտի Այցելէ Երեւան

Հայաստանի մէջ Զուիցերիոյ դեսպան Լուքաս Կասեր «Արմէնփրես» լրատու գործակալութեան յայտնած է, որ յառաջիկայ երկու շաբթուան ընթացքին յստակ կը դառնայ, թէ Զուիցերիայէն որո՛նք ներկայ պիտի գտնուին Օիժեռնակաբերդի արարողութեան: Ան նշած է, որ ներկայ դրութեամբ կը ճշդուի պատուիրակութեան կազմը:

«Յառաջիկայ երկու շաբթուան ընթացքին յայտնի պիտի դառնայ պաշտօնական պատուիրակութեան կազմը: Մակայն ներկայ դրութեամբ կրնամ յայտարարել, որ Զուիցերիոյ խորհրդարանը բաւական մեծ պատուիրակութեամբ ներկայ պիտի ըլլայ Օիժեռնակաբերդի մէջ», ըսած է դեսպանը:

Անդրադառնալով հայ-թրքական յարաբերութիւններուն՝ Կասեր ըսած է, որ ինչպէս վեց տարի առաջ, Զուիցերիան հիմա եւս պատրաստակամ է միջնորդի դեր կատարելու:

«Զուիցերիան պատրաստակամ է, եթէ կողմերը ցանկութիւն յայտնեն յարաբերութիւններու բնականոնացման համար: Մերտ կապի մէջ ենք թէ՛ թրքական, թէ՛ հայկական իշխանութիւններուն հետ: Իրագել ենք Հայաստանի դեկլարութեան վերջին որոշումին այն մասին, որ հայ-թրքական արձանագրութիւնները ետ կանչուած են Ազգային ժողովէն, սակայն նոյնիսկ այդ փաստը հաշուի առնելով՝ կը կարծենք, որ հայ-թրքական արձանագրութիւնները լաւագոյն միջոցն են երկու երկիրներու յարաբերութիւններուն բնականոնացման համար», ըսած է դեսպանը:

Հայաստանի Հանրապետութեան Ազգային Ժողովը Միաձայնութեամբ Յոյներու Եւ Ասորիներու Ցեղասպանութիւնը Դատապարտող Յայտարարութիւն Ընդունեց

Հայաստանի Հանրապետութեան Ազգային ժողովը Չորեքշաբթի օր յայտարարութիւն մը ընդունեց՝ դատապարտելով Օսմանեան կայսրութեան մէջ յոյներու եւ ասորիներու ցեղասպանութիւնը:

Յայտարարութեան մէջ կ'ըսուի, որ Ազգային ժողովը, արձանագրելով հայ, յոյն եւ ասորի ժողովուրդներու դարերու խորքէն եկող բարեկամական յարաբերութիւնները, կը յայտարարէ, որ կը դատապարտէ Օսմանեան կայսրութեան կողմէ իրականացուած յոյներու եւ ասորիներու ցեղասպանութիւնը:



Յայտարարութիւնը ընդունուած է միաձայնութեամբ. կողմ քուէարկած է 117 պատգամաւոր, դէմ եւ ձեռնպահ քուէարկողներ չեն եղած:

Դ. Բաբայեան. «Ազրպէյճանական Տեսանիւթը Բեմականացում Է, Հայ Զինուորին Համազգեստը՝ Փոխում»

Ազրպէյճանական մամուլը արդէն 2 տեսանիւթ հրապարակած է՝ ցոյց տալով, թէ ինչպէ՛ս հայ զինուորը սպիտակ կտորը ձեռքին մօտեցած է ազրպէյճանական ուժերուն:

Երկրորդ՝ աւելի երկար տեսանիւթին մէջ, Անդրանիկ Գրիգորեան սենեակին մէջն է: Կցկտուր պատասխաններով, աջ ու ձախ նայելով՝ ան իր արարքը կը պատճառաբանէ զօրամասին մէջ կրած ճնշումներով, ըսելով, թէ «պատերազմիլ չ'ուզեր, կ'ուզէ ապրիլ», եւ «ով որ ուժեղ է, լաւ կ'ապրի»:

Լեոնային Ղարաբաղի Հանրապետութեան նախագահի աշխատակազմի ղեկավարի տեղակալ Դաւիթ Բաբայեան վստահ է, որ ասիկա ճնշումներու արդիւնքով բեմականացում նկարահանում է, լսուող խօսքերն ալ ոչ մէկ կապ ունին իրականութեան հետ:

«Գրիգորեանին պարտադրած են, որ այդպիսի բաներ ըսէ, նոյնը ըրած էին Ինջիդուլեանի հետ: Նոյն մարդիկն են, նոյն խումբն է, պարզ կ'երեւի. այսինքն՝ այդ մարդիկը ուղղակի բռնութեան կ'ենթարկեն եւ փաստօրէն յուշարարի պէս բան մը դրուած է այնտեղ, այդ մարդը կը կարդայ որոշ գաղափարախօսութիւններ», ընդգծած է Բաբայեան: Լեոնային Ղարաբաղի նախագահի աշխատակազմի ղեկավարը բեմականացում անուանած է նաեւ ազրպէյճանական սահմանին մօտենալու մասին տեսանիւթը: Նախագահին բանբերը նշած է՝ հայ զինուորին այլ համազգեստ հագցուցած են:

«Վերի մասը կը տարբերի վարի հատուածէն, գոյները եւ այլն: Կ'երեւի, որ ինչպէս նախապէս մեր իջեւանցի քաղաքացիին կօշիկները փոխած էին, հիմա ալ անոր վարի մասը փոխած են: Վերի մասը հայկական համազգեստ է, իսկ վարի մասը՝ ոչ», նշած է Դաւիթ Բաբայեան:

Անոր համար զարմանալի է նաեւ ազրպէյճանական կողմի հանդարտութիւնը. նոյնիսկ եթէ զինուորը սպիտակ դրօշով կը մօտենայ, դիրքերուն վրայ հսկող զինուորները պէտք է յատուկ գործողութիւն իրականացնեն:

«Որովհետեւ կրնար ինք մինչեւ ատամները զինուած ըլլար, եւ ինքզինք պայթեցնէր: Այսպիսի բաներ չենք տեսներ: Կարծես թէ ամէն ինչ սպասելի էր, եւ բոլորը կը սպասէն, որ ինք գայ եւ կը նկարահանեն: Այս ամէնը ցոյց կու տայ, որ ասիկա եթէ նոյնիսկ տեղւոյն վրայ իրականացում է, բայց իրականացում է թիկունքին մէջ, այսինքն, Ազրպէյճանի պատկերասփիւռէն եկած են եւ այդ նկարահանումները կատարած», ըսած է Լեոնային Ղարաբաղի Հանրապետութեան նախագահի աշխատակազմի ղեկավարի տեղակալ Դաւիթ Բաբայեան:

Դաւիթ Բաբայեան «Ազատութիւն» ձայնասփիւռի կայանին հետ զրոյցին ընթացքին նաեւ ըսաւ. «Ինչ որ նկարահանած են, ոչ մէկ ձեռով կապ ունի առաջին զիծին հետ: Անոնք կրնան իրենց դիրքերը ըլլալ, ուղղակի երկրորդ, երրորդ, չորրորդ զիծէն նկարահանելին»:

Ըստ Բաբայեանի, Անդրանիկ Գրիգորեանի զօրամասին մէջ սկսած է քննութիւն, որուն իբրեւ արդիւնք պարզ պիտի դառնայ, թէ ինչպէ՛ս զինուորը աննկատ ձգած է իր զէնքն ու զինամթերքը եւ քալած ազրպէյճանական սահմանին ուղղութեամբ:

«Չեմ կասկածիր, որ գերութեան մեջ գտնուող հայ զինուորը այժմ հոգեկան լուրջ խնդիրներ ունի, սակայն կը վստահեցնեմ, որ հայկական զինեալ ուժերուն մէջ աշխատանքի սկսելու ատեն, բժշկական յանձնախումբը անոր մօտ հոգեկան շեղումներ չէ արձանագրած: Եթէ ըլլար այդպիսի խնդիր, ինչո՞ւ բանակ պիտի ընդունէին զայն», ըսած է Բաբայեան: Ան հաւաստած է, որ հայ զինուորին դէպքը կապուած չէ 19 մարտին սահմանագիծին վրայ արձանագրուած լարուածութեան :« Անդրանիկ Գրիգորեան սահմանը անցած է ազրպէյճանական կողմի յարձակումէն 3 օր ետք: Ղարաբաղեան իշխանութիւնները կը քննարկեն նաեւ ազրպէյճանական յատուկ նշանակութեան ուժերու կողմէ հայ զինուորը առեւանգելու վարկածը: Բայց ներթափանցման կամ առեւանգման հաւանականութիւն գրեթէ չկայ: Եթէ այդպիսի բան ըլլար, իրենք չէին կրնար աննկատ գալ եւ նման քայլի դիմել: Երկրորդ՝ զէնք-զինամթերքը անպայման հետը կը տանէին, որպէսզի ցոյց տային, որ վնասագերծած են ներթափանցող մը: Յոյց կու տային ժապաւենին նման՝ յատուկ ջոկատայինները, երեսները ներկած, կու գան եւ կը վնասագերծեն այդ մարդը», ըսած է Բաբայեան:

Պաշտպանութեան Փոխնախարար. «Լարուածութիւն Կայ, Ազրպէյճան Կը Փորձէ Սադրել»

Հայաստանի Հանրապետութեան պաշտպանութեան փոխնախարար Արա Նազարեանին լրագրողները Չորեքշաբթի օր հարցուցած են սահմանին վրայ տիրող վիճակին մասին:

«Ինչո՞ւ առաջին գիծին վրայ կը գոհուին 18-19 տարեկան զինուորները, եւ ինչո՞ւ փորձառու պայմանագրային զինուորները չեն կանգնած առաջին գիծին վրայ» հարցումին Նազարեան պատասխանած է. «Սահմանին վրայ կանգնած են փորձառու անձեր, բոլորն ալ փորձառու են, պատահական մարդ այնտեղ չի կրնար կանգնիլ: Հակառակորդին սադրանքները հիմա կը փորձէք մեզի՞ վերագրել: Ազրպէյճան իր կորուստներուն պատկերը փակած է եւ չ'ըսեր, իսկ Հայաստանի Հանրապետութեան պաշտպանութեան նախարարութիւնը կ'ընէ կարելին, սահմաններու պաշտպանունակութեան ամրապնդման համար»:



Պատասխանելով այն հարցումին, թէ ներկայիս ի՞նչ վիճակ կը տիրէ սահմանին, պաշտպանութեան փոխնախարար Արա Նազարեան ըսած է. «Հակակշիռի տակ է: Բնականաբար կայ լարուածութիւն, որ կապուած է Մինսքի խմբակի յառաջիկայ միջոցառումներուն, իսկ Ազրպէյճան կը փորձէ սադրել»: Պատասխանելով այն հարցումին, թէ արդեօք լարուածութիւնը կը յանգեցնէ լայնածիր պատերազմի, փոխնախարարը ըսած է. «Իմ անձնական կարծիքովս՝ պատերազմ չի սկսիր, ատիկա իրենց ձեռնտու չէ»:

«Հայկական կողմը ինչպէ՞ս կը պատրաստուի հակադրուելու ամենօրեայ ներթափանցումներու միջոցով ուժերը ջլատելու Ազրպէյճանի ռազմավարութեան», հարցումին ի պատասխան, Արա Նազարեան նշած է, որ տագնապի խաղաղ լուծման հոլովոյթին մէջ Հայաստան ազնիւ է եւ կ'ընէ կարելին, որպէսզի տագնապի խաղաղ լուծման հոլովոյթը պահպանուի: «Երկիր»-ի հարցումին, թէ արդեօք սահմանի լարուածութեան մասին Մէլրան Օհանեան խօսած է Հաւաքական անվտանգութեան պայմանագրի կազմակերպութեան նախագահ Նիքոլայ Պորտիժայի հետ, Նազարեան պատասխանած է. «Ես տեղեակ չեմ, թէ՛ ի՞նչ խօսած են»:

ՀՅԴ 124-Ամեակի Հանդիսաւոր Տօնակատարութիւն՝ Ստեփանակերտի Մէջ

«Դաշնակցութիւնը յանուն Արցախի». այս խորագիրը կը կրէ ՀՅ Դաշնակցութեան 124-ամեակի տօնակատարութիւններու շարքը, որ հանդիսաւոր կերպով կը նշուի Արցախի տարբեր շրջաններուն մէջ: Տօնակատարութիւններուն վերջին հանգրուանը Ստեփանակերտն էր, ուր 21 մարտին Մշակոյթի եւ երիտասարդութեան պալատի մեծ սրահին մէջ տեղի ունեցաւ տօնական ձեռնարկ:



Ձեռնարկին բացումը կատարուեցաւ Արցախի եւ ՀՅԴ քայլերգներով՝ «Մոակած» համոյթին եւ «Մենք ենք մեր սարերը» երգի ու պարի պետական համոյթին կատարողութեամբ: Այնուհետեւ մէկ վայրկեան լռութեամբ ներկաները յարգեցին վերջին օրերուն դարաբաղեան-ազրպէյճանական սահմանին հերոսաբար նահատակուած զինուորներուն յիշատակը:

Ելոյթով հանդէս եկաւ Արցախի թեմի առաջնորդ Պարգեւ արք. Մարտիրոսեան, որ շնորհաւորելով ներկաները՝ կարեւոր նկատեց Դաշնակցութեան անցած հայանուէր ճամբան, եւ անոր դերակատարութիւնը Արցախի ազատագրման, պետականութեան կայացման ու հայրենիքի շէնացման գործին մէջ:



Իսկ ՀՅԴ Բիւրոյի անդամ, Հայ դասի եւ քաղաքական հարցերու գրասենեակի պատասխանատու Կիրօ Մանոյեան փոխանցեց ՀՅԴ Բիւրոյի ողջոյնի եւ շնորհաւորանքի խօսքը:

Աշխարհի շուրջ երեք տասնեակ երկիրներէ շնորհաւորական ուղերձներ ուղարկած էին ՀՅԴ Արցախի կառոյցին, Արցախի ժողովուրդին՝ ՀՅԴ 124-ամեակին առիթով, որ տեսերիզով ներկայացուեցաւ ձեռնարկին:

Ելոյթով հանդէս եկաւ Լեռնային Ղարաբաղի Հանրապետութեան փոխվարչապետ, ՀՅԴ Արցախի Կեդրոնական կոմիտէի անդամ Արթուր Աղաբեկեան, որ շեշտեց. «Դաշնակցութիւնը բառիս բուն իմաստով, կարգախօսով է, որով արցախցիներս՝ անկախ գաղափարական, քաղաքական մօտեցումներէն, կրնանք մէկտեղել մեր կարողութիւնները, դիմակայելու թէ՛ արտաքին եւ թէ՛ ներքին մարտահրաւերները: Եւ միայն այս ձեւով Արցախի ժողովուրդը կրնայ ազդակ ուղարկել եւ իր շուրջը համախմբել համայն հայութիւնը՝ Մենք կարողութիւնը ունինք ակնկալելու, որ ազգը կը հասնի այն

գիտակցութեան, թէ Դաշնակցութիւնը պատմական ազդակ է հայ իրականութեան մէջ, եւ իր գիտակցութեան չափով նիւթապէս կը նպաստէ ՀՅԴ-ի գոյութեան եւ գործին:

ՀՅԴ-ն ամենապակաս կուսակցութիւն է եւ այդ ամենապակասութեան մէջ է իր միութիւնը եւ նոյնութեան գաղտնիքը: Ան այնքան անփոփոխ չի մնար, որ հիննայ ու անպէտք դառնայ հանրային կեանքի ղեկավարութեան համար, բայց նաեւ այնքան չի փոխուիր, որ դառնայ յեղեղով: ՀՅԴ-ն իր բնոյթով կը մնայ նոյնը, բայց կը յարմարի կեանքին: Փոփոխութիւնները ոչ թէ կը բեկեն, այլ՝ կը հոսին, ոչ թէ կը յեղաշրջեն, այլ՝ կը բարեշրջեն ®»:

ՀՅԴ-ի հրաւերով Արցախ կը գտնուէր արմատներով Սուրիայէն, «Շատոյեան» նորաձեւութեան տան հիմնադիր Գեորգ Շատոյեան: Տեղի ունեցաւ «Շատոյեան» նորաձեւութեան տան ժամանակակից ձեւաւորմամբ ազգային տարազներու առաջին եւ բացառիկ ցուցադրութիւնը, որ, ինչպէս իր ելոյթին մէջ նշեց հեղինակը, նուիրուած է Հայոց ցեղասպանութեան 100-ամեակին եւ պիտի ցուցադրուի նաեւ այլ երկիրներու մէջ:



ՀՅԴ 124-ամեակին նուիրուած տօնակատարութիւնը եզրափակուեցաւ 104 տարի առաջ, ՀՅԴ 20-ամեակին առիթով գրուած երգով՝ «Մենք ենք մեր սարերը» համոյթին կատարողութեամբ:

Վարչապետը Յանձնարարեց Տնտեսութեան Բարգաւաճման Առաջարկներ Ներկայացնել



Վարչապետ Յովիկ Աբրահամեանի գլխաւորութեամբ Չորեքշաբթի օր տեղի ունեցած է Հայաստանի տնտեսական զարգացումներուն վերաբերող խորհրդակցութիւն, որուն մասնակցած են առնչակից նախարարութիւններու եւ կառոյցներու ներկայացուցիչներ: Քննարկուած են տնտեսութեան աշխուժացման, արտահանման խթանման, նոր ներդրումներու ներգրուման, գործարար միջավայրի բարելաման, մրցունակութեան բարձրացման վերաբերող

հարցեր: Անդրադարձ կատարուած է նաեւ Հայաստանի տնտեսութեան զարգացման ուղղուած քայլերուն:

Վարչապետ Յովիկ Աբրահամեան խորհրդակցութեան մասնակիցներուն յանձնարարած է շարունակել տնտեսութեան բարգաւաճման ուղղութեամբ համակարգուած աշխատանքներու իրականացումը եւ ներկայացնել համապատասխան առաջարկներ:

Հաղորդագրություն

Ապրիլ 22-24.

Հայոց Ցեղասպանության 100-ամեակի

Միջոցառումներ

Հայոց ցեղասպանության 100-րդ տարելիցին նուիրուած միջոցառումները համակարգող Վիգէն Սարգսեանը Հանրային հեռուստատեսութեան եթերում մանրամասնել է, թէ ինչ միջոցառումներ են տեղի ունենալու 100-րդ տարելիցի շրջանակներում, հաղորդում է «Հայոց ցեղասպանութեան 100-րդ տարելից» պաշտոնական կայքէջը (www.armeniangenocide100.org):

Ապրիլին 22-23-ին կ'անցկացուի «Ընդդէմ ցեղասպանութեան յանցագործութեան» միջազգային ֆորումը, որը կ'ունենայ շուրջ 500 մասնակից ողջ աշխարհից:

Ապրիլի 23-ին տեղի է ունենալու Ցեղասպանութեան գոհերի սրբադասումը: Այդ օրը Մուրբ Էջմիածնում բաց խորանի առջև տեղի կ'ունենայ սրբադասման արարողությունը, ուղիղ հեռարձակմամբ կապ կը հաստատուի աշխարհի խորոշագույն հայկական եկեղեցիների հետ, որտեղ եւս հաւաքուած կը լինեն հայկական համայնքների ներկայացուցիչները: Այդ ծեսը կ'աւարտուի խորհրդանշական ըոպէին՝ 19:15-ին, և Մայր աթոռում ու աշխարհում սփռուած բոլոր հայկական եկեղեցիներում միաժամանակ կը հնչեցուի գուժկանը՝ եկեղեցական տագնապի 100 զանգերը միաժամանակ կը խորհրդանշեն 100-րդ տարելիցը, որից յետոյ կը ազդարարուի լռութեան ըոպէ:



Մէկ ժամ անց՝ 20:30-ին, Հանրապետութեան հրապարակում տեղի կ'ունենայ «SOAD» ռոք խմբի համերգը, որը բաց է հանրութեան համար:

Ապրիլի 24-ի առաւօտեան արտասահմանեան պատուիրակութիւնների մասնակցութեամբ Ծիծեռնակաբերդում տեղի կ'ունենայ Ցեղասպանութեան գոհերի ոգեկոչման արարողութիւնը: Այնուհետև տեղի կ'ունենայ Ցեղասպանութեան թանգարան-ինստիտուտի նորացուած ցուցադրութեան հանդիսաւոր վերաբացումը:

Ապրիլի 24-ի երեկոյան Հանրապետութեան հրապարակում տեղի կ'ունենայ Հաւաքական սիմֆոնիկ նուագախմբի համերգը: Այն կը կայանայ վերածննդի գաղափարի ներքոյ և այդ խորհուրդով էլ կը սկսուի 20:15-ին:

www.aztagdaily.com

ԱՆԴՆԱԴԱՐՁ

Ֆրանց Վերֆել (1890-1945)



Ֆրանց Վերֆելը ծնած է 1890-ին Պրահա, կրթությունը ստացած է Լայպցիկի, Համպուրկի, եւ Պրահայի մէջ: Ծառայած է Աւստրիական բանակին մէջ: Մասնակցած է 1918 թուականի յեղափախական իրադարձութիւններուն: 1938-ին Աւստրիոյ՝ ֆաշիստական բռնազաւթումէն ետք կը տեղափոխուի Ֆրանսա, 1940-ին՝ ԱՄՆ (Քալիֆորնիա): Գրական ասպարէզ կը մտնէ որպէս բանաստեղծ, լոյս կ'ընծայէ «Աշխարհի բարեկամը» (1911 թ.), «Մենք կանք» (1913 թ.), «Բարեկամը բարեկամի համար» (1915 թ.), «Դատաստանի օրը» (1919 թ.), բանաստեղծութիւններու ժողովածուները, ուր կը պատկերէ պատերազմի սարսափները: Վերֆելի բանաստեղծութիւններուն մէջ արտայայտուած են հաւատը՝ բարիի եւ մարդու նկատմամբ, մարդկութեան ծառայելու ցանկութիւնը, եղբայրութեան ու հաւասարութեան գաղափարները:

Երեք տարի Վիեննայի Միսիթարեան միաբանութեան մէջ կ'ուսումնասիրէ հայոց պատմութիւնն ու մշակոյթը, կը ծանօթանայ առաջին համաշխարհային պատերազմին վերաբերող փաստաթուղթերուն, կը զրուցէ թրքական կոտորածներէն փրկուած հայերուն հետ եւ կը գրէ «Մուսա լերան 40 օրը», (1933 թ.) վէպը: Վէպին հաւաքական հերոսը հայ ժողովուրդն է, յատկապէս՝ մտաւորականութիւնը, որոնք ներկայացուցիչները՝ Գաբրիէլ Բագրատեանը, Տէր Հայկազունը, Հաբեթ Իսկէնտէրեանը, Տիգրան Անդրեասեանը եւ ուրիշներ, տառապած, պայքարած եւ զոհուած են հայրենիքի համար թուրքական ջարդարարներուն դէմ: Վէպի հիմքը Մուսա Լերան հերոսամարտն է, որտեղ եւ կազմակերպուեցաւ ինքնապաշտպանութիւն՝ 53 օր շարունակ յաջողութեամբ յետ մղուեցաւ թրքական զօրքերու յարձակումները: «Մուսա լերան 40 օրը» վէպը առանձնակի տեղ կը գրաւէ Վերֆելի ստեղծագործութիւններուն մէջ: Դատապարտելով հայերու ցեղասպանութիւնը՝ Վերֆելն աշխարհին կ'ահազանգէ Գերմանիոյ ռազմամուկ քաղաքականութեան արհնալի հետեւանքներուն մասին, եւ մուսալեռնցիներու հերոսական պայքարի օրինակով մարդկութեան կոչ կ'ընէ անձնագոհ պայքարի:

«Մուսա լերան 40 օրը» վէպը լոյս կը տեսնէ այն ժամանակ, երբ ամբողջ մարդկութիւնը ֆաշիզմի սպառնալիքին տակ էր: Գերմանիոյ մէջ այն կ'արգիլուի եւ հրապարակաւ կ'այրուի: Վէպը 1934-ին կ'արժանանայ «տարուայ լաւագոյն վէպ» միջազգային մրցանակին: Վէպը հայերէն կը հրապարակուի 1935-ին, 1957-ին, համանուն վէպի հիման վրայ Չեխ երգահան Յոզէֆ Մատելը կը գրէ օրերայ, իսկ 1982-ին կը նկարահանուի գեղարուեստական ֆիլմ: Վէպը թարգմանուած է աւելի քան 20 լեզուներով:

Ֆ.Վերֆել յանկարծամահ կ'ըլլայ 26 Օգոստոս 1945 –ին, ԱՄՆ-ի մէջ: Հետագային խումբ մը երախտաւոր հայեր գրողի աճիւնը կը տեղափոխեն Վիեննա եւ իր պատուին խաչքար կը կանգնեցնեն: Երեւանի մէջ իր անուան փողոց կ'անուանեն եւ իր դիմանկարով դրոշմանիշ կը հրապարակեն:

Մեծ Եղեռնի յուշահամալիրի յուշապատին կը փակցուի յուշատախտակ, որուն տակ կ'ամփոփուի Վերֆելի գերեզմանէն բերուած հողով սափոր:

«Կարդալով եւրոպական թերթերը՝ ես ծանօթացայ հայ ժողովուրդի ողբերգութեանը: Ես այնպէս ցնցուած էի, որ որոշեցի այդ բոլորը ներկայացնել պատմական վէպով: Սուրիոյ մէջ ես տեսայ հայ երեխաներու, պատանիներու, քշուած ժողովուրդի դժբախտ բեկորներու, որոնց աչքերուն մէջ դրոշմուած էին անցեալի փառքն ու սարսափները»:

Ֆրանց Վերֆել

Պատրաստեց՝ Քուէթի ազգային վարժարանի տնօրէն Մանուկ Մանուկեան

ՀԱՂՈՐԴԱԳՐՈՒԹԻՒՆ



Հայ Օգնութեան Միութեան Քուէթի Մեկուսի Մասնաճիւղը Մարտ 12-ին, կազմակերպեց «Միջինք» Քուէթի Ազգային վարժարանի շրջափակէն ներս:

ՀՕՄ ՔՄՄ-ի վարչութեան Ատենապետուհին՝ ընկհ. Մակի Թադոյեան փոխանցեց վարչութեան խօսքը բարի գալուստ մաղթելով բոլոր ներկաներուն:

Օրուան հանդիսավարն էր ընկհ. Քրիսթին Օհանեան:

Հանդիսավարը եւ ընկերային յանձնախումբի անդամները միասնաբար պատրաստած էին ճոխ յայտագիր մը, որ կ'ընդգրկէր բազմաթիւ հաճելի խաղեր:

Ներկաները ուրախ ժամեր անցուցին մասնակցելով խաղերուն եւ վայելով համադրամ ճաշերը:

ՀՕՄ ՔՄՄ-ի դաստիարակչական յանձնախումբը պատրաստած էր միջինքի եւ աւանդական սովորոթիւններու մասին բացատրողական թերթիկներ:

ՀՕՄը իր բժախնդիր աշխատանքով կը ձգտի պահպանել Հայկական սովորոթիւնները եւ աւանդութիւնները:

ՀՕՄ ՔՄՄ-ի Քարոզչական Ցանձնախումբ

ՄԻՋԱԶԳԱՅԻՆ

Իրանի Եւ Վեցեակին Միջեւ Համաձայնութիւնը Գրեթէ Վճռուած Է



Արեւմտեան աղբիւրներ «Հայաթ» օրաթերթին յայտնած են, որ «Իրանի եւ անոր հիւլէական թղթածրարին առնչակից վեց պետութեանց միջեւ քաղաքական համաձայնութեան մը շրջագիծին շուրջ համաձայնութեան մը հասնելու առիթները շատ բարձր են»:

«Միացեալ Նահանգներու նախագահ Պարաք Օպամայի վարչակարգը ամէն գնով համաձայնութիւն մը կ'ուզէ եւ երոպացիները կը մղէ զայն ամսուան աւարտէն առաջ

ստորագրել աճապարելու» նշած են աղբիւրները՝ աւելցնելով. «Համաձայնութիւնը գրեթէ վճռուած է. միակ տարակարծութիւնը Թեհրանի դէմ հաստատուած պատժամիջոցներու ջնջման հարցին շուրջ է»:

«Էրպաս-320» Մը Չախջախուեցաւ Ալպիան Լեռներուն Վրայ

Գերմանական «Ճրքմընուիւնկզ» ընկերութեան պատկանող «Էրպաս-320» տիպի ճամբորդատար օդանաւ մը Երեքշաբթի օր ջախջախուեցաւ Ալպիան Լեռներու ֆրանսական հատուածին մէջ՝ Պարսելոնէթի եւ Տիյնի միջեւ վայրի մը մէջ: 144 ճամբորդներ եւ անձնակազմի 6 անդամ փոխադրող օդանաւը թռիչք կը կատարէր Պարսելոնայէն Տիւսելտորֆ:



Ֆրանսայի նախագահ Ֆրանսուա Հոլլանտ յայտնեց, որ «արկածի պայմանները, որոնք տակաւին յստակ չեն, մեզ կը մղեն մտածելու, որ վերապրողներ չկան»՝ աւելցնելով, որ արկածը ողբերգութիւն մըն է, իսկ անոր վայրը՝ դժուար հասանելի: Ան հետագային ցուակցութիւն յայտնեց Գերմանիոյ վարչապետ Անկելա Մերքելին:

Սպանիոյ Ֆիլիփ թագաւորը, որ պետական այցելութեամբ կը գտնուէր Ֆրանսա, շնորհակալութիւն յայտնեց ֆրանսական կառավարութեան՝ իր ցուցաբերած օժանդակցութեան համար եւ նշեց, որ կը ջնջէ իր այցելութեան մնացեալ մասը: Ֆրանսայի ներքին գործոց նախարարութիւնը յայտարարեց, որ օդանաւին բեկորները յայտնաբերուած են 2 հազար մէթր բարձրութեան վրայ՝ աւելցնելով, որ վայրին անհասանելիութեան պատճառով փրկարար աշխատանքները «չափազանց երկար եւ չափազանց դժուար» պիտի ըլլան:

«Աշխարհի Փոխարեն Սուրիա Եւ Իրաք ՏԱՀԵՇ-ի Դէմ Կը Պայքարին» Ըսաւ Ժաաֆարի

Իրաքի արտաքին գործոց նախարար Իպրահիմ Ժաաֆարի Երեքշաբթի օր ընդառաջելով իր սուրիացի պաշտօնակիցին հրաւերին այցելեց Դամասկոս, ուր հանդիպում ունեցաւ սուրիացի բարձրաստիճան պաշտօնատարներու,



ներառեալ՝ Սուրիոյ նախագահ Պաշշար Ասատի հետ: Ան իր հանդիպումներուն ընթացքին քննարկեց ահաբեկչութեան թղթածրարը եւ շարք մը հասարակաց հետաքրքրութեան հարցեր՝ նշելով, որ աշխարհի փոխարեն Սուրիա եւ Իրաք ՏԱՀԵՇ-ի դէմ կը կռուին: Ան յայտնեց, որ Իրաքի ապահովութիւնը կը բխի Սուրիոյ ապահովութենէն, եւ երկու երկիրներուն դիմագրաւած հասարակաց վտանգները երկու երկիրներուն միջեւ աւելի բարձր համակարգում կը պահանջեն:

Ժաաֆարի Սուրիոյ արտաքին գործոց նախարար Ուալիտ Մոալլեմի հետ միացեալ մամլոյ ասուլիսի մը ընթացքին շնորհակալութիւն յայտնեց Սուրիոյ՝ Իրաքի կողքին կանգնելուն համար՝ նշելով. «Երբեք պիտի չմոռնանք, թէ Սուրիան ինչպէ՛ս կանգնեցաւ Իրաքի կողքին»: Ան ըսաւ, որ գետնի վրայ ցամաքային ուժերու կարիքը չկայ, որովհետեւ իրաքեան բանակը իր պարտականութիւնը կը կատարէ, սակայն արաբական երկիրները կրնան օդուժի օժանդակութիւն տրամադրել՝ աւելցնելով. «Դրացի երկիրները պէտք է Սուրիոյ եւ Իրաքի կողքին կանգնին, որպէսզի ահաբեկչութիւնը իրենց չհասնի»:

Մոալլեմ իր կարգին նշեց, որ Սուրիան ու Իրաքը հասարակաց ճակատագիր ունին, եւ երբ Սուրիան լաւ վիճակի մէջ ըլլայ, Իրաք եւս լաւ կ'ըլլայ:

Խօսելով Եգիպտոսի մասին, Մոալլեմ ըսաւ, որ իրենք կը հասկնան Եգիպտոսի պայմանները եւ կը յուսան, որ այդ երկիրը շուտով դուրս կու գայ իր ճգնաժամէն՝ աւելցնելով, որ «մինչեւ հիմա Սուրիոյ նկատմամբ Եգիպտոսի կեցուածքին մէջ փոփոխութիւն մը չնշմարեցինք», եւ յոյս յայտնեց, որ Գահիրէն շուտով կը վերադառնայ իր պատմական դերակատարութեան:

Փորձագէտներ անդրադառնալով Արաբական լիկայի Շարմ Շէյխի վեհաժողովի նախօրեակին Ժաաֆարիի Սուրիա այցելութեան կը յայտնեն, որ իրաքեան կողմը թերեւս ժողովին փոխանցէ սուրիական կողմին տեսակետը, մասնաւորաբար ահաբեկչութեան դէմ պայքարի հարցին վերաբերեալ:

Աւելի ուշ հաղորդուեցաւ, որ Ասատ Ժաաֆարիի հետ հանդիպումին ընթացքին յայտնած է, որ սուրիական եւ իրաքեան բանակներուն արձանագրած յաջողութիւնները նպաստած են ահաբեկչութեան յառաջխաղացքը կասեցնելու, իսկ Ժաաֆարի յայտնած է, որ Իրաք նախանձախնդիր է սուրիացի ժողովուրդի կողքին կանգնելու:

Լոնտոն Եւ Ռիատ. «Ասատ Սուրիոյ Մէջ Ղերակատարութիւն Պիտի Չունենայ»



Մեռուական Արաբիոյ արտաքին գործոց նախարար Մեռու Ֆայսալ իշխանը բրիտանացի իր պաշտօնակից Ֆիլիփ Համընտի հետ ունեցած միացեալ մամլոյ ասուլիսի ընթացքին յայտնեց. «Ժընեւ 1»-ի յայտարարութեան սկզբունքները սուրիական տագնապի լուծման շրջագիծներն են են, որոնց հիմամբ Սուրիոյ նախագահ Պաշար Ասատ եւ բոլոր անոնք, որոնց ձեռքերը սուրիացիներուն արիւնով ներկուած են, պիտի չունենան որեւէ ներկայ կամ ապագայ ղերակատարութիւն»:

Ան ըսաւ, որ անհրաժեշտ է աշխատանք տանիլ, որպէսզի Իրան հիւլէական զէնքի չտիրանայ, «Բան մը, որ կրնայ սպառնալ շրջանի եւ աշխարհի ապահովութեան, մասնաւորաբար Իրանի կիրարկած թշնամական քաղաքականութեանց եւ շրջանի երկիրներուն հարցերուն միջամտութեանց լոյսին տակ»:

Ինչ կը վերաբերի Եմէնի կացութեան, Ֆայսալ իշխանը ըսաւ. «Այդտեղ լուծումը միայն միջազգային միաձայնութեան ակննդ տալով կ'ըլլայ եւ յեղաշրջումի մերժումով»՝ աւելցնելով. «Եմէնի ապահովութիւնն ու Ծոցի համագործակցութեան խորհուրդի անդամ երկիրներուն ապահովութիւնը անմասնատելի են»: Ան ըսաւ, որ Ծոցի երկիրները պիտի ընդառաջեն Եմէնի նախագահ Ապետ Ռապո Մանսուր Հատիի՝ Ռիատի մէջ վերջինիս հովանաւորութեամբ երկխօսութեան նիստ գումարելու առաջարկին:

Բրիտանիոյ արտաքին գործոց նախարարը իր կարգին յայտնեց. «Այն ինչ որ Եմէնի մէջ տեղի կ'ունենայ, քաղաքացիական պատերազմ է, եւ Բրիտանիա դատապարտեց Եմէնի մէջ յարձակումները»՝ նշելով, որ ինք վերահաստատած է, որ Բրիտանիա կը շարունակէ աջակցիլ Եմէնի նախագահ Մանսուրին եւ զինք նկատել օրինական նախագահ: «Միջազգային ընտանիքը ձեռնաձայլ պիտի չմնայ, մինչ որոշ ուժեր Եմէնը կը քանդեն», նշեց Համընտ:



Բրիտանական դիւանագիտութեան պետը ըսաւ, որ զինուորական ջանքը առանձինը չի կրնար ՏԱՀԵՇ-ը պարտութեան մատնել, այլ պէտք է օտար զինեալներու հոսքը եւ ծայրայեղականներու ֆինանսաւորումը դադրեցնել:

«Բրիտանիա Սուրիոյ մէջ չափաւորական ընդդիմութեան ամրապնդման կ'աջակցի, որպէսզի զետնի վրայ ստեղծուի հաւասարակշռութիւն մը, որ սուրիական վարչակարգը մղէ քաղաքական քննարկումի» ըսաւ Համընտ՝ աւելցնելով. «Սուրիոյ նախագահ Պաշար Ասատ Սուրիոյ ապագային մէջ դէր պիտի չունենայ»:

ՏԵՍԱԿԷՏ

Քաղաքական Պահ Ստեղծելու Առիթը



Հայաստանի Հանրապետության Ազգային ժողովին կողմէ յոյներու եւ ասորիներու ցեղասպանութիւններուն վերաբերող բանաձեւի միաձայն քուէարկութեամբ, մեր երկիրը դարձաւ երրորդը, որ կը ճանչնայ այս ցեղասպանութիւնները:

Աւելի ճիշդը, հայերու, յոյներու եւ ասորիներու ցեղասպանութիւնները

ճանչցած է Շուէտի խորհրդարանը 16 մարտ 2010-ին. յոյներու ցեղասպանութիւնը՝ Յունաստանն ու Կիպրոսը: Տակաւին. Յունաստանը 2004-ին յատուկ բանաձեւով ճանչցած էր Պոնտոսի յոյներու, իսկ 1998-ին՝ Փոքր Ասիոյ յոյներու ցեղասպանութիւնները: Ուրեմն ասորիներու եւ յոյներու ցեղասպանութիւններու ճանաչման աշխարհագրութիւնը շատ փոքր էր:

Հայաստանի Հանրապետության Ազգային ժողովի երկուսն նիստը միաձայնութեամբ, 117 քուէով որդեգրեց հետեւեալ բանաձեւը «Առաջնորդուելով ՄԱԿ-ի Ընդհանուր ժողովի 1946 թուականի դեկտեմբերի 11-ին ընդունուած 96 (1) բանաձեւով եւ 1948 թուականի դեկտեմբերի 9-ի ՄԱԿ «Ցեղասպանութեան նախագոյնացման եւ դրա համար նախատեսուած պատժի», ինչպէս նաեւ 1968 թուականի նոյեմբերի 26-ի «Մարդկութեան դէմ գործած յանցագործութիւնների եւ ռազմական յանցագործութիւնների վաղեմութեան ժամկէտի անընդունելիութեան» մասին ուխտերով ու մարդու իրաւունքների մասին բոլոր այլ միջազգային արժեքի դրոյթներով ու սկզբունքներով, հաշուի առնելով հայ, յոյն եւ ասորի ժողովուրդների՝ դարերից բխող բարեկամական յարաբերութիւնները՝ Հայաստանի Ազգային ժողովը յայտարարում է, որ դատապարտում է Օսմանեան կայսրութիւնում իրականացրած յոյների եւ ասորիների ցեղասպանութիւնը»:

Բանաձեւի նախագիծի ներկայացման նախորդած էր Հիմնաւորում օսմանեան կայսրութեան կողմէ 1915-1923-ին յոյներու եւ ասորիներու ցեղասպանութիւններու դատապարտման մասին բանաձեւի նախագիծի ներկայացումը: Այնտեղ պատմական փաստեր, իրականացուած ջարդերու եւ տեղահանութիւններու կանխամտածուած ըլլալը, զոհերու թիւերը, ժամանակն ու աշխարհագրութիւնը նշուած են եւ բոլորը արդարացուած ձեւով տեղաւորուած ցեղասպանութեան ուխտի սահմանած դրոյթներուն մէջ: Նշուած նաեւ, որ ժամանակակից ցեղասպանագիտութիւնը հայերու, յոյներու եւ ասորիներու ցեղասպանութիւնները կը դիտարկէ մէկ ընդհանուր քաղաքականութեան բաղկացուցիչ մասեր:

Պատմականօրէն եւ իրաւաքաղաքականօրէն ներկայացուած փաստերն ու հիմնաւորումները քննարկումի տեղ չեն ձգեր երկու ժողովուրդներու ապրած ցեղասպանութիւնները ճանչնալու եւ դատապարտելու: Անշուշտ կան տարբեր

քննարկելի հարցեր: Յունաստանը ընդհանրապես յոյներու ցեղասպանութեան միջազգայնացումը արտաքին քաղաքականութեան օրակարգի նիւթ չէ դարձուցած, իսկ ասորիները՝ իբրեւ պետականագուրկ եւ քաղաքական գործօնի ոչ բաւարար կարգավիճակ ունեցող համայնք լոպիիստական առաջադրուած ուժականութիւնը չունին իրենց ազգային ողբերգութիւնը միջազգայնացնելու:

Յատկապէս ասորիներու պարագային, այսօր սակայն ա՛յս խնդիրը, անկախ իրենց կողմէ դրսեւորելի ենթադրեալ նախաձեռնողականութենէն, այժմէական հրատապութեամբ այսօրուան իրադարձութիւններուն լոյսին տակ պատմական իրադարձութիւններու հետ համեմատութիւններ կը ստեղծէ՝ ընդգծելու համար, որ այս ժողովուրդը երկրորդ անգամ ըլլալով կ'ենթարկուի ցեղասպանութեան, առաջինը ուղղակի Օսմանեան կայսրութեան, իսկ ներկայիսը պատուիրուած, ֆինանսաւորուած Անգարայի կողմէ:

Համեմատական ցեղասպանագիտութիւնը ընդհանուր քաղաքականութեան մը բաղադրիչները համարելով տակաւին ընդհանրութիւններ եւ տարբերութիւններ կը գտնէ երեք ցեղասպանութիւններուն միջեւ:



Այս հանգրուանին էականը մեզի համար այլ ուղերձ եւս ունի: Այսպէս: Եթէ մանրադիտակի տակ բերենք բանաձեւը, այնտեղ կը նկատենք, որ յոյներու եւ ասորիներու ցեղասպանութիւնները անառարկելիօրէն կ'ամբողջացնեն ցեղասպանութեան ուխտի բանաձեւած կէտերը: Մարդկութեան դէմ կատարուած յանցագործութիւններու վաղեմիութեան ժամկէտի անընդունելիութեան ընդգծումը պարզ է, որ կը վերաբերի նաեւ Հայոց ցեղասպանութեան եւ այս հանգրուանին նման շեշտադրում լոյսին բերելը աւելի քան ըմբռնելի է: Նոր չէ նաեւ գիտակցումը հայ, յոյն եւ ասորի ժողովուրդներու պատմական բարեկամութեան:

Հայաստանի Հանրապետութեան Ազգային ժողովին կողմէ հիմա՛ նման բանաձեւ ընդունիլը, Հայոց ցեղասպանութեան 100-րդ տարելիցին ուղերձ ունի անպայման: Օսմանեան կայսրութեան կողմէ ցեղասպանուած ժողովուրդներու համախմբման կոչ կը պարփակէ բանաձեւը. զօրակցելով զօրակցութեան հրաւեր: Պատահական չէր նաեւ այն, որ ամերիկեան քոնկրետի բանաձեւը առանց Յեղասպանութիւն եզրի օգտագործման կը խօսէր կրօնական կալուածներու վերադարձի պահանջին մասին. ընդ որում նաեւ յունական եւ ասորական: Իսկ ասորիներու նոր ջարդերն ու տեղահանութիւնները քաղաքականօրէն արծարծելու համար ճիշդ հունաւորման պարագային կը գրաւեն միջազգային շրջանակներ անպայման:

Հայաստանի Հանրապետութեան Ազգային ժողովին բանաձեւի լուռ կոչը՝ տուժած ժողովուրդներու ուժերու համախմբման քաղաքական պահ ստեղծելու լաւագոյն առիթ ունի. Հայոց ցեղասպանութեան 100-րդ տարելիցը:

www.aztarar.com

ԿՆՈՋԱԿԱՆ

Մեծ Մայրիկի Թելադրանքներ

Կօշիկին Գեշ Հոտը Չեզոքացնելու Համար

Ամրան եղանակին յաճախ մեր կօշիկները գեշ կը հոտին: Ահաւասիկ՝ մեծ մայրիկի հետաքրքրական թելադրանք մը, որ կ'արժէ փորձել:

Իւրաքանչիւր կօշիկի մէջ 2 ապուրի դգալ քարաղ կամ bicarbonate de soude դրէք եւ առնուազն 12 ժամ սպասեցէք, ապա կօշիկները թօթուեցէք եւ պիտի նկատէք, որ գեշ հոտը չեզոքացած է:



Որպէսզի ձեր մազի խոզանակը լաւապէս մաքրուի, ունիք 2 միջոց.



Ա.- Խոբունկ ամանի մը մէջ 1 լիթր ջուր լեցուցէք, աւելցուցէք 4 ապուրի դգալ bicarbonate de soude եւ խոզանակը ամբողջ գիշեր մը այդ ջուրին մէջ ձգեցէք: Յաջորդ առտու առատօրէն ցողուեցէք եւ անձեռոցով մը ցամբեցուցէք:

Բ.- Խոբունկ ամանի մը մէջ կէս առ կէս համեմատութեամբ ջուր եւ քացախ լեցուցէք, մազի խոզանակը ամբողջ գիշեր մը մէջը ձգեցէք, իսկ յաջորդ օրը ցողուեցէք եւ ցամբեցուցէք:

Ճերմակ եղունգներ ունենալու համար զանոնք օրական շփեցէք կիսուած կիտրոնի կտորով մը, կամ եղունգները քանի մը վայրկեան մխրճեցէք կիտրոնի հիւթի մէջ:



Մրջիններէն ձերբազատելու միջոցները այլազան են, ահաւասիկ՝ քանի մը թելադրանք.

Ա.- Լաւանտի փոքրիկ փունջեր զետեղեցէք դուռերուն եւ պատուհաններուն մօտ:

Բ.- Ջուրով լուծուած քացախ քսեցէք պատուհաններուն եւ մրջիններուն բոյներուն չորս կողմը:

Գ.- Ռեհանի կամ անանուխի տերեւներ զետեղեցէք անոնց անցքերուն երկայնքին:



Դ.- Ամանի մը մէջ սուրճի մրուր դրէք եւ զայն զետեղեցէք մրջիններուն բոյնին մօտ:

Գլխու թեփերէն ձերբազատելու համար օգտագործեցէք խնկունին (ռոմարեն): 1 լիթր ջուր եռացուցէք, քանի մը ճիւղ խնկունի աւելցուցէք եւ միջակ կրակի վրայ 15 վայրկեան եռացուցէք: Պատելէն ետք սուզեցէք եւ ստացուած հեղուկով ցողուեցէք ձեր մազերը:





ՍՐԲՈՑ ՎԱՐԴԱՆԱՆՑ ԵԿԵՂԵՑԻՈՅ

ԹԱՂԱԿԱՆՈՒԹԻՒՆ - ՔՈՒԷՅԹ

ԺԱՄԱՆԱԿԱՑՈՅՑ

ԱԻԱԳ ՇԱԲԹՈՒԱՆ ԱՐԱՐՈՂՈՒԹԵԱՆՑ

ԱԻԱԳ ԵՐԵՔՇԱԲԹԻ, 31 Մարտ 2015 (ՅԻՇԱՏԱԿ ՏԱՍԸ ԿՈՒՍԱՆԱՑ)

Երեկոյեան Ժամերգութիւն Ժամը 18:30

ԱԻԱԳ ՀԻՆԳՇԱԲԹԻ, 2 Ապրիլ, 2015 (ՅԻՇԱՏԱԿ ԸՆԹՐԵԱՑ ՅԻՍՈՒՄԻ ՔՐԻՍՏՈՍԻ)

Աշակերտական Պատարագ Ժամը 08:00

Կարգ Ոտնկուայի Ժամը 19:00

Հսկում Ժամը 21:00

ԱԻԱԳ ՈՒՐԲԱԹ, 3 Ապրիլ, 2015 (ՅԻՇԱՏԱԿ ԽԱՉԵԼՈՒԹԵԱՆ ԵՒ ԹԱՂՄԱՆ)

Կարգ Թաղման Ժամը 12:00

ԱԻԱԳ ՇԱԲԱԹ, 4 Ապրիլ, 2015 (ՃՐԱԳԱԼՈՅՑ ՍՈՒՐԲ ՅԱՐՈՒԹԵԱՆ)

Սկիզբ Ժամերգութեան Ժամը 18:30

Սուրբ Պատարագ Ժամը 19:30

ԿԻՐԱԿԻ, 5 Ապրիլ, 2015 (ՏՕՆ ՅԱՐՈՒԹԵԱՆ ՅԻՍՈՒՄԻ ՔՐԻՍՏՈՍԻ)

Սուրբ Պատարագ Ժամը 11:30

Քարոզ Ժամը 12:30

*Կը պատարագէ եւ յաւուր պատշաճի կը քարոզէ
Թեմիս Բարեջան Առաջնորդ՝*

ԳԵՐՊ. Տ. ՄԱՍԻՍ Ծ. ՎՐԴ. ԶՕՊՈՒՅԵԱՆ

ԵՐԿՈՒՇԱԲԹԻ, 6 Ապրիլ, 2015 (ՅԻՇԱՏԱԿ ՄԵՌԵԼՈՑ)

Գերեզմանօրհնէք Ժամը 14:30 -17:00

Այսու կը հրաւիրենք մեր հաւատացեալ ժողովուրդը ներկայ ըլլալու Աւագ Շաբթուան եւ Սուրբ Յարութեան տօներու հոգեպարար արարողութեանց, հաղորդուելու համար անոնց սրբազան խորհուրդով:

Քուէյթ
27 Մարտ 2015

ՍՐԲՈՑ ՎԱՐԴԱՆԱՆՑ ԵԿԵՂԵՑԻՈՅ
ԹԱՂԱԿԱՆ ԽՈՐՀՈՒՐԴ